

- प्रधानमंत्री नरेन्द्र मोदी कह्या-विविधता मांय एकता भारत री विशेषता-पूरी दुनिया प्रयागराज महाकुम्भ मांय भारत री शक्ति ने देख्यो है।
- आधार पहचान संख्या ने मतदाता पहचान पत्र सूं जोड़बा री तैयारियां बाबत् मुख्य चुनाव आयुक्त ज्ञानेश कुमार नई दिल्ली मांय बैठक करी।
- राज्य मांय पशुधन री सुरक्षा खातर आज सूं टीकाकरण अभियान री शुरुआत-दो करोड़ सूं बत्ता जिनावरां रे टीका लगाबा रो लगस।
- प्रदेश रा 99 पुलिस अहलकारां अर कर्मचारियां ने डीजीपी डिस्क अर मान पत्र खातर चुण्यो गयो।

000

प्रधानमंत्री नरेन्द्र मोदी कह्या के प्रयागराज महाकुम्भ उभरता भारत री भावना ने दरसायो है अर पूरी दुनिया भारत री शक्ति ने देख्यो है। वे कह्या के विविधता में एकता भारत की विशेषता है, इण ने हाल ही मांय पूरा व्ह्या महाकुम्भ रे दौरान अनुभव कर्यो गयो है। महाकुम्भ माथे आज लोकसभा मांय बयान देता थकां श्री मोदी कह्या के पूरो विश्व चुनौतीपूर्ण टेम सूं गुजर रह्यो है, इण हालात मांय एकता रो भव्य प्रदर्शन देश री सब ऊं बड़ी ताकत है। वणा विविधता में एकता री इण विशेषता ने बत्तो मजबूत करबा माथे जोर दिया।

000

जल संरक्षण रा महत्व माथे प्रधानमंत्री कह्या के देश मांय केई नदियां है अर उण मांय सूं कुछ एक खतरा मांय है। कुंभ सूं प्रेरणा लेता थकां म्हाने नदी उत्सव री परंपरा ने नयो विस्तार देणो पड़ेला।

000

रेलवे लारला दस बरसा मांय पांच लाख नौकरियां दी हैं वठिने एक लाख सूं बत्ती नौकरियां खातर भर्ती प्रक्रिया चाल री है। रेल मंत्री अश्विनी वैष्णव कह्या के भारतीय रेलवे री माली हालत चोखी है अर सरकार इण ने और बेहतर बणावा माथे काम कर रही है। श्री वैष्णव रेल मंत्रालय रा कामकाज माथे लोकसभा मांय चर्चा रो जवाब देता थकां आज या बात कही।

000

मुख्य चुनाव आयुक्त ज्ञानेश कुमार आज गृह मंत्रालय अर विधायी मेहकमां रा सचिवां अर भारतीय विशिष्ट पहचान प्राधिकरण रा मुख्य कार्यकारी अधिकारी रे सागे बैठक करी। नई दिल्ली मांय व्ही इण बैठक मांय आधार पहचान संख्या ने मतदाता पहचान पत्र सूं जोड़बा माथे चर्चा करी गयी। इण बीच चुनाव आयोग लम्बा टेम सूं चाल री निर्वाचन सूं जुड़ी चुनौतियां सूं निपटबा खातर केई कदम उठाया है। इण मांय आवता तीन म्हीनां रे भीतर डुप्लिकेट मतदाता पहचान पत्र रा मुद्दा रो हल काडनो अर चुणाव एजेन्टां ने वां री मेहताऊ भूमिका रा बारा मांय प्रशिक्षण देबा सूं जुड़्या मुद्दा शामिल है।

इण रे इतर, मतदान केंद्रां माथे लंबी कतारां ने कम करबा वास्ते निर्वाचन आयोग यो भी ऐलाण कर्यो है के भविष्य मांय किणी भी मतदान केंद्र माथे एक हजार दो सौ सूं बत्ता मतदाता नी व्हेला।

000

लोकसभा अध्यक्ष ओम बिरला कह्या के लोकतंत्र रो आधार संवाद अर आम सहमति है इण खातर संसदीय लोकतंत्र मांय विपक्ष री भूमिका सकारात्मक अर रचनात्मक व्हेणी चाहिजे। श्री बिरला आज दिल्ली विधानसभा रा सदस्यां खातर राख्या दो दिन रा प्रबोधन कार्यक्रम रा उद्घाटन सत्र मांय बोल रह्या हा। श्री बिरला कह्या के सदस्यां ने लोगां री जरूरतां ने पूरो करता थकां अर संवैधानिक मूल्यां ने बणाया राखता थकां सदन री परम्परावां रो पालन करणो चाहिजे।

उप मुख्यमंत्री प्रेमचंद बैरवा कह्या के राज्य मांय बिना किणी भेदभाव रे विकास रा काम करवाया जा रह्या है सरकार सगळा तबका रा कल्याण खातर लोगां री उम्मीद सूं बेहतर काम कर री है। श्री बैरवा आज जोधपुर प्रवास माथे पूग्या, हवाई अड्डे माथे खबरनवीसां सूं बातचीत कीनी। वणा सगळा विधानसभा हलका मांय कर्या जा रह्या विकास कामां माथे संतोष जतायो। श्री बैरवा जोधपुर रा लूणी हलका मांय राख्या गया होळी मिलन कार्यक्रम मांय भाग लीना इण दौरान कैबिनेट मंत्री जोगाराम पटेल भी मौजूद रह्या।

000

राज्य मांय आज सूं जिनावरां रो टीकाकरण अभियान सरू कर्यो गयो। पशुधन री सुरक्षा ने ले र सरू कर्यो गयो यो अभियान 17 मई ताई चलेला। इण रे तैत तहत जिनावरां मांय होबा वाळी खुरपका, मुंह पका बीमारियां सूं बचाव खातर टीकाकरण कर्यो जावेला। पशुपालन मेहकमां रा निदेशक डॉ. आनन्द सेजरा बताया के प्रदेश मांय आवता दो म्हीना मांय दो करोड़ सूं बत्ता पशुआं रा टीकाकरण रो लगस राख्यो गयो है।

000

राज्यपाल हरिभाऊ बागडे आज चूरू पूग्या। वणा अहलकारां रे सागे बैठक कर जिला रा विकास कामां री समीक्षा करी। राज्यपाल जिला मांय किसानां ने **पीएम सूर्य घर योजना** सूं जोडबा, औद्योगिक विकास ने गति देबा, रूजगार रा मौका मुहैया करावा अर बत्ता ऊं बत्ता पेड़ लगाबा माथे जोर दीना। श्री बागडे राज्य वृक्ष खेजड़ी रा संरक्षण अर संवर्धन माथे खास ध्यान देबा ने कह्या। जिला परिषद सभागार मांय व्ही इण बैठक मांय विधायक हरलाल सहारन, जिला कलेक्टर अभिषेक सुराना अर पुलिस अधीक्षक जय यादव समेत दूजा अहलकार मौजूद रह्या।

000

जलग्रहण यात्रा आज सलूम्बर जिला री झल्लारा पंचायत समिति पूगी। या यात्रा प्रदेश रा 27 जिलां रा 110 ब्लॉका मांय पाणी अर मिट्टी ने बचावा रो संदेश दे री है। प्रधानमंत्री कृषि सिंचाई योजना-2.0 रे तैत जलग्रहण विकास अर भू-संरक्षण रा उद्देश्य सूं इण ने देश भर मांय चलायो जा रह्यो है। यात्रा रे पूगबा माथे पंचायत समिति मुख्यालय माथे नुक्कड नाटक, कठपुतली शो समेत दूजा सांस्कृतिक कार्यक्रम व्हा वटे ई टाबरा खातर होड़ा राख्यी गयी। इण मौके पाणी बचावा री शपथ दिलाई गई। यात्रा आवता दो दिनां ताई जिला री न्यारी-न्यारी पंचायत बणायी जावेला।

000

प्रदेश मांय **पहचान पोर्टल** माथे जन्म, मृत्यु अर विवाह पंजीयन सूं जुड़्या करीब तीन करोड़ पचास लाख डाटा भेळा व्हे चुक्या है। आर्थिक अर सांख्यिकी महकमां रा निदेशक विनेश सिंघवी बताया के आमजन री सुविधा खातर राज्य मांय **ऑनलाईन वेबपोर्टल 'पहचान'** रे मार्फत ई-साईन करयोड़ो जन्म, मृत्यु अर विवाह प्रमाण पत्र जारी कर्या जा रह्या है। वे बताया के आवता टेम माथे पोर्टल माथे डाटा और बढ़ेला इण हालात रे चालता पोर्टल ने भामाशाह स्टेट डाटा सेंटर मांय शिफ्ट कर्यो जा रह्यो है। वे बताया के शिफ्टिंग रे दौरान दो दिन खातर 20 अर 21 मार्च ने पहचान पोर्टल सूं जन्म, मृत्यु अर विवाह पंजीयन सूं जुड़्या सगळा काम बंद रहवेला।

000

प्रदेश रा 99 पुलिस अहलकारां अर कर्मचारियां ने डीजीपी डिस्क अर प्रशस्ति पत्र खातर चुण्यो गयो है। पुलिस महानिदेशक उत्कल रंजन साहू काल इण बाबत् एक आदेश जारी कर चयनितां री सूची जारी करी। श्री साहू बताया के पुलिस सेवा रा अहलकारां अर कर्मचारियां रो मनोबल बढ़ाबा खातर महानिदेशक पुलिस प्रशस्ति डिस्क अर प्रशस्ति रोल दिया जावा रो प्रावधान कर्यो है। चयनितां मांय अतिरिक्त महानिदेशक मालिनी अग्रवाल अर विशाल बंसल, इंटेलिजेंस ट्रेनिंग एकेडमी रा निदेशक दीपक भार्गव, समेत दूजा अधिकारी अर कर्मचारी शामिल है।

000

जयपुर मांय 21 मार्च ने डाक अदालत राख्यी जावेला। जयपुर डाकघर मण्डल प्रवर अधीक्षक बताया के इण दौरान मण्डल सूं जुड़्या डाक काउन्टर सेवा, मनीऑर्डर, स्पीड पोस्ट, पार्सल समेत दूजा मामलां री सुणवाई करी जावेला। शिकायतकर्ता प्रकरण ने पूरे ब्यौरा रे सागे 19 मार्च ताई कार्यालय मांय प्रस्तुत कर सके है।

000

जयपुर मांय विजयदान देथा साहित्य उत्सव राख्यो जा रह्यो है। 21 मार्च सूं जवाहर कला केन्द्र मांय होबा वाळां तीन दिन रा इण उत्सव मांय न्यारी—न्यारी साहित्यिक गतिविधियां व्हेला। जवाहर कला केन्द्र री अतिरिक्त महानिदेशक अल्का मीणा बताया के इण दौरान कवि सम्मेलन भी राख्यो गयो है।

000

जयपुर मांय पर्यटन महकमां री कानी ऊं होबा वाळो पाक्षिक आयोजन कल्चरल डायरीज रो सातवों संस्करण 21 अर 22 मार्च ने व्हेला। अल्बर्ट हॉल माथे होबा वाळा इण कार्यक्रम मांय कथक नृत्य अर ताल वाद्य कचहरी री प्रस्तुति व्हेला।

000

प्रदेश मांय पश्चिमी विक्षोभ रो असर कम होबा रे बावजूद तापमान मांय बढ़ोतरी रा आसार है। मौसम महकमां रे मुजब आवता चौबीस घंटा मांय तापमान मांय 2 सूं 3 डिग्री सेल्सियस ताई री बढ़ोतरी व्हे सके है। इण बीच लारला 24 घंटां मांय बाड़मेर मांय पारो 35 डिग्री सेल्सियस रे पार माप्यो गयो। चित्तौडगढ़, डूंगरपुर, जालौर मांय भी दिन रो तापमान 34 डिग्री सेल्सियस ऊं ऊपर रियो।

000

चित्तौडगढ़ मांय पुलिस आज दो न्यारा—न्यारा मामलां मांय 10 किलो सूं बत्ती अफीम जब्त कर दो लोगां ने गिरफ्तार कर्यो है। पुलिस अधीक्षक सुधीर जोशी बताया के अवैध मादक पदार्था री धरपकड़ खातर चलाया जा रह्या अभियान रे तैत नाकाबंदी रे दौरान मंडपिया सूं या अफीम जब्त करी गई।

000

प्रदेश मांय एग्रीस्टेक योजना रे तैत फार्मर रजिस्ट्री शिविर राख्या जा रह्या है। इणी कड़ी मांय आज जयपुर रा चौमू उपखण्ड री चार ग्राम पंचायतां मांय शिविर लगाया गया। उपखण्ड अधिकारी दिलीप सिंह राठौड़ बताया के ये शिविर इटावा भोपजी, महार कलां, देवथला अर हस्तेड़ा मांय लगाया गया।

000